



Igl areal dalla Fabrica da ponn Trun suenter la construcziun dil baghetg niev all'entschatta dils onns 1960.



Ils meglers onns ha la Fabrica da ponn Trun purschii lavur a rodund 400 persunas.

FOTOS H. HUONDER/MAD

## Co la viafier ha leventau speronzas e promoviu l'industria

In'exposiziun speciala seregorda dall'avertura dalla Fabrica da ponn Trun avon 100 onns

DA HANS HUONDER / ANR

■ Igl emprem d'uoost 1912 ei staus d'eminente impurtonza historica per la part su dalla Surselva ed en special era per la vischnaunca da Trun. Lu ei igl emprem tren carraus tenor urari entochen Mustér ed il medem di ha la Fabrica da ponn Trun aviert ufficialmeinsias portas. Decennis ha ella saviu subsister, buc il davos era grazia al survetsch dalla Viafier retica. Uonn festivescha la Viafier retica il giubileum da 100 onns dalla lingia da Glion a Mustér. Quei tiern vegn commemoraus cun festivitads allas differentas staziuns. Accumpignada vegn la fiasta da giubileum era d'entgins arranschaments specials. In da quels vegn offerius a Trun el Museum sursilvan dalla Cuort Ligia Grischa. Leu vegn numnadamein documentau la historia dalla Fabrica da ponn Trun. La realisaziun da quella interpresa industrialia ei stada pusseviva grazia alla nova lingia da viafier che possibilitava aschia il transport dalla rauba. Avon haveva in menaschi industrial en ina regiun senza viafier sco la Surselva praticamein negina schanza da subsister. Il traffic individual haveva buca las capacitads necessarias.

### D'impurtonza economica

La Fabrica da ponn Trun ei stada d'eminente impurtonza per l'economia dalla part su dalla Surselva. Ils meglers onns ha ella purschii paun e fadigia a rodund 400 collaboraturas e collaboraturs dalla regiun. La fabrica ei vegnida fundada da Fidel Tuor ed aviarta igl onn 1912. Entochen ch'ella ha stuiu serrar las portas igl onn 2001 ha ella midau differentas ga possessur e directur. Gia avon che la fabrica da ponn daventi activa era vegniu empruau a Trun da s'engaschar industrialmeins, per exempel enten explotar fier ed argien. Gia duront gliez temps, all'entschatta dil 19avel tschentaner, era pader Placidus a Spescha perschadius che l'existenza dalla vischnaunca e da sia populaziun seigi dependenta da novas fontaunas finanzialas. Differentas interpresas ein naschidas, mo era svanidas fetg spert. Pliras da quellas era pervia dils problems dil transport ni era per interess da speculaziun. Quei ei semidau igl onn 1912 cura che la Fabrica da ponn Trun ha aviert sias portas. Il problem dil transport era eliminus entras la nova colligiazun dalla Viafier retica.

### In menaschi flurent

Suenter in barschament igl onn 1913 entscheiva l'interpresa a flurir pér da dretg. La fabrica eregia ina reit da filialas ell'entira Svizra tudestga: Cuera, Turitg, S. Gagl, Berna, Winterthur, Biel e Solognon. La fabricaziun d'uniformas duront la Secunda uia mundiala flurescha. Per quei motiv moderniseschan ils possessurs il parc da maschinis ils onns 1940. Novs talers vegnan installai e sin fundament dalla biara lavur eis ei necessari d'endrizzar ulteriuras alzadas per la lavur. La fatschenta marscha fetg bein era il temps da pasch suenter la Secunda uia mundiala. 1949 vegn endrizzau ina nova filantaria, 1955 vegn aviert in'atgna cantina e 1957 vegn il niev magasin all'entrada dil vitg da Trun aviarts. La construcziun dil baghetg niev dalla fabrica igl onn 1960/61 munta la fin dalla fasa da carschament, essend ch'ils products favorevels digl ost entscheivan plaun a plaun ad influenzer la fier dil vest. Per la Fabrica da ponn Trun entscheiva ina fasa cun grondas sfidas. Igl onn 2001 sto la fabrica la fin finala resingar e serrar. Ad ella eis ei buca reussiu da far frunt alla

concorrenza, quei malgrad l'emprova da differentes possessurs e directurs novs. Ina davosa emprova da spindrar il menaschi ha Martin Zindel fatg. 1993 ha el surpriu la fabrica. Igl onn 1996 ha ella aunc contonschii ina svulta da 9,7 milliuns francs cun 105 collaboraturas e collaboraturs. Dapi entgins onns ein ils baghetgs dall'anteriura Fabrica da ponn Trun en possess dalla Distec SA da Mustér. Ultra dad ella vegnan las localitads nezegiadas ussa denter auter era dalla Gritex SA.

### In'exposiziun el museum

El rom dil project «GR Focus» e dil giubileum da 100 onns dalla lingia da viafier da Glion a Mustér nezegian il historiograf Severin Rüegg (Turitg) ed il scienziav d'architettura Pascal Werner (Turitg/Cuera) la caschun da realisar in'exposiziun per il giubileum da 100 onns dalla Fabrica da ponn Trun. L'exposiziun ei prevedida dils 2 da zercladur entochen ils 14 da fenadur 2012 el Museum sursilvan dalla Cuort Ligia Grischa a Trun. Ultra da fotografias dil menaschi, mo era films historics, prospects ed uniformas producidas pli baul a Trun intendan ils iniziants

dall'exposiziun era da documentar l'impurtonza dalla fabrica cun intervistas cun persunas che han luvrau pli baul el menaschi. Per quei motiv ein Severin Rüegg e Pascal Werner era alla tscherca da documents sco texts, films ni fotos dalla fabrica: «Nus essan leds da mintga document, surtut da tals che muossan il mintgadi ella fabrica.» Ils documents san vegnir tarmess entochen miez avrel a GR Focus, Kaltbrunnstrasse 6, 7000 Cuera ni dai giu tier il Museum sursilvan ella Cuort Ligia Grischa (Giusep Decurtins). Medemamein vegnan els a contactar il proxim temps persunas cun ina relaziun tier la fabrica per aschia saver realisar las intervistas previdas per l'exposiziun. Parallelmeinsper l'exposiziun a Trun vegn fatg il mument las preparativas era per ina exposiziun ella Casa da cultura Rosengarten a Grösch. Leu vegn mussau la historia dalla fabrica da pupi da Landquart che ha aviert sias portas avon 140 onns. Ils dus projects d'exposiziun vegnan susteni da pliras varts, denter auter digl Uffeci per cultura dil cantun Grischa, il Museum sursilvan dalla Cuort Ligia Grischa e digl archiv dalla vischnaunca da Trun.



Il historiograf Severin Rüegg (sen.) ed il scienziav d'architettura Pascal Werner.



Igl emprem d'uoost 1912 ha la Fabrica da ponn Trun entschiet cun sia producziun.



La vestgadira da «Truns» era enconuschenta pli baul en l'entira Svizra.



Inauguraziun e benedicziun dils baghetgs novs dalla fabrica. Seniester Giusep Condrau ed amiez igl artist Alois Carigiet.